

Lelaki tampar bekas isteri dipenjara 12 bulan

KUCHING: Mahkamah Majistret di sini semalam menjatuhkan hukuman penjara 12 bulan terhadap seorang lelaki kerana menampar bekas isterinya.

Majistret Mason Jaro Lenya Barayan menjatuhkan hukuman itu terhadap Hillary Eteli, 42, selepas dia mengaku bersalah mengikut Seksyen 323 Kanun Keseksan yang dibaca bersama Seksyen 326A kanun sama.

Hillary didakwa menyebabkan kecederaan

kepada isterinya yang berusia 44 tahun di sebuah rumah di Kampung Tabuan Hilir sekitar jam 2.40 pagi pada 29 Julai 2022.

Berdasarkan fakta kes, Hillary datang ke rumah untuk melepak tetapi diminta oleh bekas isterinya beredar.

Melihatkan keadaan tersebut, Hillary naik angin dan melemparkan kata-kata kesat kepada bekas isterinya dan anak perempuan mereka sebelum menampar

mangsa, yang kemudian menyebabkan mangsa mengalami kesakitan di sekeliling mukanya.

Bimbang akan keselamatan diri, mangsa membuat laporan polis yang membawa kepada penangkapan Hillary pada 29 Ogos 2022.

Siasatan mendapati Hillary telah menampar bekas isterinya yang turut disaksikan oleh anak perempuan mereka semasa berada rumah.

Hillary tidak diwakili peguam.